



KOMUNIKADU IMPRENSA SELEBRASAUN LORON MUNDIAL AI-HAN 16 Outubru 2024

Investe ba agrikultura sustentável hodi asegura ema nia direitu ba ai-han

Uluk nana'in ami hato'o ami nia parabéns ba maluk toos na'in no kamponeza sira hotu iha Timor-Leste no mós iha mundu tomak. Maske ita boot sira sempre hasoru dezafiu oin-oin, ita boot sira kontinua involve iha atividade produsaun ai-han ho fornese ai-han ba ema barak nia moris.

Tema mundiál selebrasaun loron mundiál ai-han tinan 2024 nian mak **Direitu ba ai-han atu hadi'ak moris no futuro**. Tema ne'e fó hanoin ba nasaun hotu katak asesu ba ai-han ne'e sai hanesan ema nia direitu, nune'e nasaun sira hotu tenke esforsu-an atu investe no prioritiza atividade produsaun ai-han ho nune'e atu reziliente liu tan.

Loron mundiál ai-han ne'e fó hanoin mós mai ita hotu katak povu Timor-Leste barak mak sei hasoru problema asesu ba ai-han ne'ebé nato'on no nutritivu, ne'ebé sei fó impaktu ba sira nia moris ohin loron no ba futuro. Fatór boot balu ne'ebé sai kauza ba problema kuran ai-han no malnutrisaun iha ita nia rain mak produsaun ai-han iha rai laran ne'ebé seidauk másimu no dependénsia ba importaun ai-han husi rai li'ur ne'ebé barak mak la ho nutrisaun di'ak.

Liu tiha tinan rua-nulu resin, governu Timor-Leste no parseiru dezenvolvimentu sira gasta ona osan tokon ba tokon ba setór agrikultura, peska, pekuária no floresta maibé seidauk konsege asegura povu hotu nia direitu ba ai-han. Ami rekoñese katak governu no parseiru dezenvolvimentu sira implementa ona programa lubuk ida hodi dezenvolve setór agrikultura hanesan harii irrigasaun, distribui tratór, fahe fini no adubu sira, no tau extensionista iha area rural sira. Maibé, orientaun programa sira ne'e barak liu mak ba hasa'e produsaun foos no batar no seidauk fó atensaun hanesan ba produktu lokál seluk. Nudár konsekuensi, Timor-Leste agora la'ós importa de'it foos, maibé importa mós produktu seluk ne'ebé antes ne'e ita nia agrikultór sira prodús maka'as hela, hanesan fehuk-ropa, liis no tomate ne'ebé oras ne'e ita hatama tonelada-ba tonelada husi Indonézia.

Situasaun ida ne'e sai hanesan preokupasaun boot ba ita hotu tanba iha tempu hanesan ita nia area agrikultura menus ba beibeik tanba konverte ba harii infrastrutura fiziku sira hanesan estrada, edifisiu, no hela fatin sira. Agrikultór sira barak mós mak idade aumenta ba beibeik no afeta ba sira nia produtividade. Ita mós tenke hasoru impaktu boot husi mudansa Klimatika ba setór agrikultura ne'ebé sei aumenta ba beibeik.

Nune'e iha oportunidade Loron Mundial Ai-han 2024 ne'e, ami hakarak hato'o ami nia hanoin no rekomendasaun balu ba Governu kona-ba oinsá bele haforsa ita nian setór agrikultura hodi asegura povu nia Direitu ba Ai-han ne'ebé nato'on ho nutritivu, tuir dalan ne'ebé sustentavel. Iha âmbito debate proposta Orsamentu Jerál Estadu ba tinan 2025, ami espera katak rekomendasaun sira ne'e bele ajuda Governu no Parlamentu Nasionál atu diskute ho kle'an no aprova orsamentu ida ne'ebé sensitivu ba problema sira ne'ebé ita nia setór agrikultura hasoru.

Tuir mai ami nia rekomendasaun espesífiku ba Governu atu konsidera:

1. Prioritiza Kapasitasaun no formasaun ba agrikultór, peskadór no hakiak animal sira atu hasa'e produsaun no jestaun tuir dalan ne'ebé sustentável. Kapasita mós família agrikultór peskadór sira atu bele hadi'ak sira nia moris liu husi diversifikasaun ekonomia ka fonte rendimentu oin-oin.
2. Rezolve problema falta bee ba agrikultura, liu-liu iha tempu bailoron, ne'ebé afeta kuaze agrikultór sira hotu. Ida ne'e bele hala'o liu husi estabelese sistema irrigasaun eskala ki'ik ka sistema kapturasaun bee iha foho sira hodi hamoris fali bee matan sira ne'ebé sempre maran durante tempu bailoron nian.
3. Suporta grupu no negósiu ki'ik sira ne'ebé halo prosesamentu ba produktu agrikultura atu iha asesu ba ekipamentu modernu sira nune'e bele hamosu produktu ne'ebé kompetitivu ho produktu importadu sira. Ekipamentu sira ne'e inklui ekipamentu ba embalajen no ekipamentu hodi koko konteúdu nutrisaun.
4. Kria ambiente atu agrikultór sira bele asesu di'ak liu tan ba merkadu liu husi hadi'ak estrada rural sira atu fasilita movimentu ba comunidade no sira nia produktu sira ba merkadu. Iha hanesan limita importaun ba produktu agrikultura ne'ebé bele prodús ona iha rai laran.
5. Suporta nafatin peskadór sira, ho facilidade peskas ne'ebé adekuaudu no asesu ba merkadu ne'ebé di'ak liu no inkorpora produktu peska iha programa merenda eskolár no Fornesimentu han ba instituisaun públiku sira.
6. Halo identifikasaun no kontrola produktu agrikultura la'ós-foos ne'ebé ita kontinua importa maske ita iha poténsia maka'as ba produsaun iha rai laran, hanesan fehuk-ropa, ikan fresku ikan maran, liis no tomate, ne'ebé kontinua tama husi Belu-NTT tanba bele hamate produsaun rai laran. Suporta ita nia agrikultór sira atu halo produsaun ba produktu sira ne'e.
7. Fó prioridade orsamentu ba promove hortikultura, hakiak animal no hakiak ikan iha nivel uma kain atu bele prodús produktu ne'ebé saudavel no iha nutrisaun di'ak ba família,
8. Promove diversifikasaun ai-han no konsiensilizasaun hodi muda kultura han, nudár dalan ida hodi hamenus importaun foos no promove ai-han lokál seluk ne'ebé nutritivu liu.
9. Promove agro-ekolojia, uza rekursu lokál atu hasa'e produsaun liu husi dalan ne'ebé la estraga meu-ambiente no kontribui ba hadi'ak klimatika.

Too ba nee de'it Komunikadu imprensa husi La'o Hamutuk ami prontu nafatin kontribui ba dezvoltamentu ne'ebé sustentavel no hametin Soberania Ai-han no Soberania ekonomia.

Viva Agrikultór Timor-Leste no Viva Soberania Ai-han,

Mariano Ferreira no Celestino Gusmão Pereira

Ekipa agrikultura, Rai no ekonomia

+670 7723 7176 no +670 7743 2621